



SURMEIR: bungs affars sur Anzainsas

## Staschung ota igl meis da matg

**G.N.S. Luvro bagn sur Anzainsas on las buteias da Beiva anfignen Lai. Dasper igls clients indigens on cunzont igls giasts dallas sagondas abitaziuns cumpro aint ainten igls affars digls lis turistics. Per part ins ò gia l'impressiun tgi fiss staschung ota.**

Eneda duple è sa musso tge valour tgi igls possessours d'abitaziuns da vacanzas èn, pigls negoziis, las furnareias, mazlareias ed er per oters travagls ed affars digls lis turistics an Surmeir. An rotscha èn els nias d'Anzainsas anfignen dumengia passada ainten la nossa regiun. Ins ò er vasia blers giasts an lis pi pitschens ed er da chels clients on igls menaschis profito fitg. Fatg lour compras sur Anzainsas on alloura er igls indigens, els tgi totgan tigs clients fidevels da mintga singul travagl.

### 40% anfignen 50% duple stgammiamaint

Blera gliout ins ò er gia aint igl «Volg» son Mitgel a Savognin. Conrad Plaz, igl administratour dalla Societad da consum Savognin e conturn discorra d'en fitg bung affar sur Anzainsas. Cunzont igl venderde ed er la sonda ins vegia gia blers clients an buteia. El dei d'aveir fatg chels dus deis ena schi gronda sviouta scu da staschung ota la stad. Vasia an buteia ins vegia fitg blers giasts stabels da Savognin e conturn, pero er daples indigens tgi schiglio. Cun betg eir sur cunfegns u aint igl



Er David Steier, igl patrung dalla Mazlareia Peduzzi a Savognin ò gia bler da far.



Ple u manc adegna occupo igls deis d'Anzainsas: igl parcadi digl «Tank Shop» a Casti.

Tessin vegian igls indigens cumpro aint ainten egna dallas treis buteias tgi la societad magna. Ansomma seian igls indigens stos las davosas otg emdas clients fidevels. Er sur Anzainsas ins vegia s'accurschia tg'els seian betg ias a Tusang u a Coira per cumprar aint. Conrad Plaz dei tgi an cumparaziun cun Anzainsas 2019 vegia igl «Volg» son Mitgel fatg tranter 40% e 50% duple stgammiamaint.

### «la sung ple tgi cuntaint»

Marcant duple clients ed uscheia er ena pi ota sviouta tgi avant en onn d'Anzainsas ò er fatg la Mazlareia Peduzzi a Savognin. Igl patrung David Steier dei: «la sung ple tgi cuntaint.» Gist igl venderde ins vegia gia fitg bler da far, dantant er la sonda vegian blers giasts e blers indigens risguardo la sia mazlareia. Igl mazler e cuschinier punctuescha tgi seia er nia cumpro aint bagn, bels tocs tgerm e da buna qualitat. Chegl vala pigls proprietaris da sagondas abitaziuns scu er pigls indigens. David Steier dei d'aveir profito dalla situaziun perveia dallas directivas digl coronavirus cun neir blers giasts dalla bassa an Surses e chels cuschinar a tgesa an lour abitaziuns. Igl gioven schef dalla Mazlareia Peduzzi manegia tgi schi spert ins vigna strousch anc eneda a luvrar schi bagn sur Anzainsas scu l'emda passada.

### 1067 clients d'Anzainsas

An veir senn «gliout scu furmeilas» igls deis d'Anzainsas ò er gia igl «Tank Shop» a Casti. Igl affar lavoura an general fitg bagn e sur Anzainsas ò el profito anc duple digl traffic

grond. Igl magnagestiu digl Consum Alvra/Surses, Alex Nietlisbach dei, tgi d'Anzainsas ins vegia gia 1067 clients aint igl «Tank Shop». El seia fitg cuntaint cu gl affar fatg sur chel fitro. Er la dumengia ins vegia gia 739 clients ed uscheia er fatg en bel stgammiamaint. Ple u manc adegna occupo sur Anzainsas è er sto igl negozi «Spar» a Lai. Cunzont igl venderde è nia cumpro aint scu schi fiss staschung ota, ò detg la secretaria. Ella dei tgi chel de ins vegia fatg tant stgammiamaint scu egn digls miglers deis durant la stad.



Bungs affars ò er fatg la buteia digl «Volg» son Mitgel a Savognin. Sortivan dus clients dalla buteia pudevan antrar puspe dus, cun betg pudeir esser duple tgi 24 clients an buteia perveia dallas ordinaziuns digl coronavirus.